

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 722 del 29/03/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 29 de mèrz vegn fora la puntata #479 del program ladin per la televizion

Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata nr. 479.

I argomenc de chesta setemèna l é: Gome Neve, l grop de robotica de la Scola Ladina de Fascia che l é jit a Genova per dèr endesfida a 37 gropes da duta la Tèlia per la finèla nazioneła de la First Lego League. La competizion la é metuda adum da desvaliva proes: la garejèda de robotica, l projet scientifich e chel tecnich. Anter fadies e tropa garejèdes i tousc e la touses de la Scola Ladina i à vent la califcazion per jir de jugn tel Massachusetts a raprezentèr la Tèlia a la FIRST LEGO League WPI.

Do doi egn da canche l é stat metù su l Comitad Gregn Evenc aon rejonà con Fausto Lorenz, President de l’APT de Fascia, che l ne à contà de chesta esperienza, di obietives arjonc e de chi per l davegnir che chest comitat, nasciù apontin per didèr l endrez de evenc de nonzech a livel burocratich e aministratif, l se met dant.

Tinultima te Pedies de chesta setemèna porton dant n auter apuntament de la rubrica “Svampol ciatarul: jent che fèsc jerveèr sie cunst”, te chel che Giorgia Felicetti, na joena aspiranta menacrep, la ne contarà de sie percors e de sie gran gust per la mont.

I report de chesta setemèna, enjigné da Riccardo Zanoner, Angela Pederiva e Sabrina Riz, i vegn porté dant da la ousc de Sabrina Riz.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina, opuramenter se pel veder i servijes un a un su la piata Facebook de TV Ladina

Traduzion di Servijes Linguistics e Culturèi del Comun general de Fascia

(cdt)